

Cama Tsətsəfə Nə Bulusu Nə Tanggərma Anə Njir Kwaranthli

Usa Dzau

¹ Cama tsətsəfə sara ara Bulusu, ndəra Hyal ngga aga ja də cama səsə nə Kərsiti Yesu lagur yiwu huda nə Hyal, ənga zamər mən Sosithlanisu,

² a nda nə dabə dzə njir nu kəra a vu Kwaranthli, njira njī ngga aga nda də njī cici wu Kərsiti Yesu, ənga njira njī thləbiya wu Kərsiti Yesu, dabə ənga kalar njī kəra ar kalar vi kəra wu ngga thləmər Thlagə Yesu Kərsitir mən, Thlagər nda ənga Thlagər mən.

³ Bəgə mayiwakur ənga hudə pərtəu sara ara Hyal Dərmən ənga Thlagə Yesu Kərsiti nda nggya ənga hyi.

Bulusu Lər Usaku Anə Hyal

⁴ Parangə nga ya vər lə usaku anə Hyal arya hyi, arya mayiwakur nyi kəra ji lər hyi wu Kərsiti Yesu.

⁵ Arya wu ja a dər hyi njir bərba wu kalar sau, kalar səra hyu na ənga kalar sənbiya sər hyi.

⁶ Arya najaka bərbakur, a cabiyari abər, kalar sakida kəra 'yi ləri arya Kərsiti jiri nga nyi.

⁷ Agabangau, nahyu ghari sə lələ nə Mambəl mai, ənggər kəra hya vər nggyar tsatsam lagu nə səkə shilər Thlagər mən Yesu Kərsiti kəra wu nda cabiya dzau.

⁸ Yesu wu nda səbiya ngə aga ga da nənau ba'anə shili ar jomə ndəl, aga ga da ndə gəra vazau ar pəcir shidar Thlagər mən Yesu Kərsiti.

⁹ Hyal, naja ndəra ngga hyi a shili wu nggya nə dabə dzə ənga zər nyi Yesu Kərsiti Thlagər mən, naja ndə tsa'a miya dəfu ngau.

Ca Paməpaməkur Wu Pama Dabə dzə Njir Nu

¹⁰ Ya vər kədi hyi wazha ama wu thləmə Thlagər mən Yesu Kərsiti, hya sara ca paməpaməkur mai, ama hya dlunggəri ənga kuvwar hyi, aga miya hyi ənga dəngar hyi a da zəməu.

¹¹ Yu na anə hyi abangə wazha ama, arya alenyi nji sara wu ki Kəlowusu nar da abər hyu pəpa wu pamə.

¹² Səra yu na, ca ngə alenyi nji wu pama hyu na, “Nayi nəda yu nu Bulusu,” alenyi nju na, “Nayi nəda yu nu Apolusu,” alenyi nji tsu ndu na, “Nayi nəda yu nu Kefasu,” ənga alenyi nji tsu ndu na, “Na'ya nər 'ya 'yu nu Kərsiti.”

¹³ Karya, Kərsiti a təkəbiyar dzə ya? Əndəga nji dlakəya Bulusu arya hyi ya? Əndəga nji hər hyi baβətizəma wu thləmə Bulusu ya?

¹⁴ Yu usaku anə Hyal, ara a'yi nayi ngə hə baβətizəma anə ndaliya hyi mai, kəl anə njir ki Kərispusu ənga Gayisu.

¹⁵ Kabangəkau, ndər sən na abər yi hər nyi baβətizəma wu thləmə da a'yi mai.

¹⁶ Jiri, a bəra dəngar yi vanyi sau, abər a hər nyir yi baβətizəma anə njir ki Sətifanusu. Ayukuda nyi tsu nayi bəra dəngari ndəra yi bəra hər nyi baβətizəma mai.

¹⁷ Ara Kərsiti a'yi səwa dā aga ya hə bəbətizəma anə nji mai, ama aga ya tətəlna ndəshigu nyi, a'yi ənga ndər nə hahangəkur ndəndəkur dā mai, a sara dənama nə wu dladlakə nə Kərsiti a dā sə tətəwa.

Kərsiti Ngə Hahangəkur Ənga Dənama Nə Hyal

¹⁸ Arya cama nə ndər nə mbədau lagu wu dladlakau, dzakur ngau anə njira sasa, ama anə mən njira uya mbədau, dənama nə Hyal ngau.

¹⁹ Arya tsətsəfə nga nyi,
“Yu nda sana hahangəkur nə nji hahangəu,
ənga sənbiya sə nə njir sən sə tsu, yu nda məliya
wu dā sə kurthləu.”

²⁰ Əmani ngə nji hahanga? Əmani ngə njir sənbiya sa? Ənga əmani ngə njir jigadəma? Hyal a'yi məliya hahangəkur nə njir duniya dā aga dzakur wa?

²¹ Arya Hyal lagu hahangəkur nyi nga ji məliya njir duniya gərə sənbiya nyi lagu hahangəkurər nda. Ama ba ji məliya lagu dzakur nə tətəlna ndər Hyal ca ngə njira hənggəri uya mbədau.

²² Njir Yahudiya wu gal lar sə dədəgur, njir Gərikəu nər nda, ndu gal hahangəkur.

²³ Ama na'ya 'yu tətəlna ndər Kərsiti ndəra nji dlakəya, kəra dā sər thlə hi anə njir Yahudiya, ənga sə dzakur anə njira a'yi njir Yahudiya mai.

²⁴ Ama anə nji kəra Hyal ngga, tara njir Yahudiya ənga tara njir Gərikəu, Kərsiti ca ngə dənama nə Hyal ənga hahangəkur nə Hyal.

²⁵ Ara dzakur nə Hyal a ndiya hahangəkur nə ndau, kukufəkur nə Hyal tsu a ndiya nənəkər nə ndau.

²⁶ Wazha ama, hya dəngari sərə hyi aga nyi ar pəcira nji ngga hyi, aga hya dā njir nu, a'yi patəkura

hyi ngə nji hahangə lagur sənbiya sə nə ndəndəkur mai, a'yi patəkura hyi ngə njira ənga dənəma mai, ənga a'yi patəkura hyi ngə yirma mai.

²⁷ Ama Hyal ngə həbiya sə dzakur nə duniya aga ja həna səli nə nji hahangəu. Ənga ji həbiya kukufəkur nə duniya aga ja həna səli njira nənau.

²⁸ Ji həbiya sərə nji didana wu duniya ənga sərə gərə ar viya vanyi sə wu duniya aga nda ndzana sərə dədur.

²⁹ Hyal məliya abangə aga nja sara ɔwadzə wu mwa nyi.

³⁰ Ama Hyal ngə hər hyi a shili wu Kərsiti Yesu, ənga Hyal a məliyarı Kərsiti da hahangəkur nər mən. Lagu nyi nga mən da nji tsapəu, nji cici nyi ənga njira ji bəliya.

³¹ Agabəngau, ənggər kərə ja tsətsəfau, “Ta'yi njir ɔwadzau nda ɔwadzə ənga Thlagəu.”

2

¹ Ənggərə yi shili əgya hyi wazha ama, aga ya sa nar hyi ar kərə jirkur nə sə dədəwa nə Hyal, nayi a'yi shili ənga ca sənbiya ndər ənga madiya hahangəkur mai.

² Ara yi həri wu dəfuwa yau, abər vanyi sə a'yi yu sən ar pəcira yi əkkə'yi hyi mai, kəl Yesu Kərsiti ənga dlakəkur nyi.

³ Tanggərma shili da əgya hyi, yi shili wu kukufəkur da ənga hivər ba ənga tsədzə gagadau.

⁴ Cama da ənga tətəlna ndər Hyal da a'yi ənga shakər ba hahangəkur nə ndəndəkur da mai, ama ənga thlər kərə cabiya dənəma Mambəl.

⁵ Sə kə dərəkər aga mbərsar hyi a sara təghər dzau ar kəra hahangəkur nə nji mai, ama kəl ar kəra dənəma nə Hyal.

Hahangəkur Nə Hyal

⁶ Alaga abangau, 'yu ndər, ndər nə hahangəkur anə njira a həri wu mbərsar nda, ama a'yi culi hahangəkur nə zaman əshina kə mai, ənga tsu a'yi culi hahangəkur təltəl'yar kəra wu sa tərabiya nə zaman kə mai.

⁷ Ama 'yu ndər ar kəra hahangəkur nə Hyal kəra dədəwa kəra nji dəwana, hahangəkur nə Hyal kəra ji pəpədləya kadivira dzəgwar duniya, aga ja da səra wu shili ənga kadakadarkur anə mən.

⁸ Ndə a'yi wu pama njir səm təlkur nə zaman əshina kə kəra nggabiya sə kə mai. Maja abər ndə nggabiya, nanda a'yi dlakəya Thlagə ndə kadakadarkur mai.

⁹ Ama ənggər kəra ja tsətsəfau, abər,

“Səra Hyal pabəri anə njir yiwu nyi

ndə a'yi kəra saya lari mai,

ndə a'yi tsu kəra saya nggar mai,

ənga tsu ndə a'yi kəra saya dəngabiya mai,”

¹⁰ ama Hyal a cabiya mən ri sə'yar kə lagu Mambəl.

Arya Mambəl nga vər walbiya kalar sau, patə əkkə'yi səra dədəwa wu nggabiya sə Hyal.

¹¹ Ara wa ngə ndəra wu səni səra ndə wu dənga ma a'yi kəl mambəl kəra wu ja waci maya? Abangə tsu ndə a'yi kəra wu sənbiya səra Hyal wu dənga mai, kəl Mambəl kəra wu Hyal wacu.

¹² Namən a'yi dləwuri mambəl nə duniya mai, ama Mambəl kəra shida sara dara Hyal, aga mənə

nggabiya lə sə ləlau nə Hyal kəra nji nə mən kurthləu.

¹³ Ca ngə sərə 'yu ndər ar kəri, a'yi sərə nji highiḡər 'ya lagu hahangəkur nə ndapi mai, ama sərə shili lagu Mambəl, kəra wu cabiya jirkur nə Mambəl anə njira wu Mambəl.

¹⁴ Ndəra gəra wu Mambəl, naju sən dləwuri sə'yar kəra sara ara Mambəl Hyal mai, arya dzakur nga nyi anə nyi, ənga naju sən nggabiya mai, arya lagu Mambəl nga nju nggabiya wacu.

¹⁵ Ndəra wu Mambəl, ju sən məl numa ar kəra kalar sau, ama naja ənga kərnyi a'yi nju sən məl numa anə nyi mai.

¹⁶ Ənggər kəra ləkakadə nana, abər, “Wa ngu sənbiya dənga nə Thlagə tara ba ja sən highiḡə sə anə nya?”

Ama a'yi mən ənga dənga nə Kərsiti.

3

Bazhi Məl Thlər Nə Hyal

¹ Wazha ama, nayi a'yi sən ndər anə hyi ənggər anə njira wu Mambəl Hyal mai, ama ənggər anə njir duniya, njira tsu nda ənggər wazha yidəḡəu, wu lagu nu Kərsiti.

² Nayi nga vər səmənə hyi ənga u'wa ənggər wazha mamanji, a'yi ənga dəfə mai, arya tsu hyi gəra nəbiya dzau. Ənga jiri, ba'anə kabangəkau, tsu hyi gəra nəbiya dzau.

³ Ba'anə kabangəkau tsu hyi ənggər njir duniya. Ma tsu hyu ca shishikur, ənga hyu pəpa wu paməu, a'yi tsu hyi ənggər njir duniya wa?

⁴ Ara ma vanyi ndə na, “Nayi nə Bulusu ngau,” vanyi ndə tsu, “Nayi nə Apolusu ngau,” a'yi tsu hyi ənggər njir duniya wa?

⁵ Dəmya, wa ngə Apolusa? Wa ngə Bulusa? A'yi njir məl thlər Hyal nga 'ya waci wa, njira lagur nda nga hyi hənggəri ənga Kərsiti wa? A'yi kalar ndə wu pama 'ya ngu məl sərə Hyal nə nyi aga ja məl wa?

⁶ Nayi ngə thləkana culi, Apolusu ngə pər nda 'yimi, ama Hyal ngə məliya nda ndə hau.

⁷ Mbar ar ndər thləka ənga ndər lə 'yimi, patə nda, sə a'yi nda aga nyi mai, ama kəl Hyal, ndəra məliya ndə hau.

⁸ Ndər thləka ənga ndər lə 'yimi raragə nga nda wu mwar Hyal, kalar ndə wu pama nda wu sa uya akkəri nyi kakalə ənga sərə ji məliya.

⁹ Ara na'ya bazhi məl thlər Hyal ngau, nahyi tsu ngə fa Hyal, ənga sərə Hyal ngə həriya.

¹⁰ Lagu mayiwakur kəra Hyal nə də, a fiyar yi hiya hər ar viya ndər hər kəra mənəhəu, ənga vanyi ndə pamə tsu a dzəgwa hər a dar kəra nyi. Ama kə kalar ndə ja tsam ənga hangəkəkal ənggəra ju hər a dari.

¹¹ Ara vanyi ndər fiya hiya hər pamə a ndiya kəra yi fiya kə a'yi mai, naja ngə Yesu Kərsiti.

¹² Alenyi nji ndə hər a dar kəra nyi ənga əndzau, ənga thladla, ba ənga tsəka dəduru. Alenyi nji tsu ndə hər a dar kəra nyi ənga wu, ənga sar, ba ənga 'yi'yi dzədzəgwau.

¹³ Thlərər nda patəu wu nda cabiya dzə ar babal ar pəcir shidar Thlagəu. Thlər kau, wu nda nəbiya dzə wu u'u kəra wu nda cabiya tara abari ngə mənəhəkura thlər kəra ndə məliya.

¹⁴ Ma thləra nyi uya mbəḍau sara wu miya u'u, ju nda uya akkəri.

¹⁵ Ma ndəra thlər nyi nggyinakər wu u'uwa nyi, ju nda uya asar, ama naja ju uya mbəḍau, ama mbəḍə nyi wu ḍa ənggər ndəra biya sara wu miya u'u.

¹⁶ Nahyi a'yi hyu səni abər ar viya Ki Hyal nga hyi wa? Ənga nahyi a'yi hyu səni abər Mambəl Hyal a vər nggya wu hyi wa?

¹⁷ Kalar ndəra ndzana Ki Hyal, Hyal wu nda ndzana nyi, arya Ki Hyal sə cici ngau, ənga nahyi ngə Ki Hyal kau.

¹⁸ Ndə ja sara ngguta kərnyı mai. Ma ndə wu pama hyi nggani abər hahangə nga ja wu nggyabiya zaman nə kabangəkau, bəgə ja fiya kərnyı ar viya ndə dza aga ja dzəgwa ḍa ənga hahangəkur.

¹⁹ Arya hahangəkur nə duniya kau, ar viya dza-kur ngau wu mwar Hyal. Ənggər kəra ja tsətsəfau, “Ju sən mbar nji hahangə wu kwadashimar nda.”

²⁰ Ənga tsu ənggər kəra tsətsəfau wu ləkakadə nə Hyal, abər, “Thlagə wu səni abər, ḍənga nə nji hahangə dzakur ngau wu mwar Hyal.”

²¹ Agabangau, ndə a sara ɓwadzə ənga ndə mai! Arya kalar sə nər hyi ngau,

²² alaga Bulusu, alaga Apolusu, alaga Kefasu, alaga duniya, alaga pi, alaga tau, alaga sərə əshina ənga sərə a vər shili, patə nər hyi ngau,

²³ ənga nahyi tsu nə Kərsiti ngau, Kərsiti tsu nə Hyal ngau.

4

Cama Səsə'yar Nə Kərsiti

¹ Nji a kyaga hər'ya ar viya njir məl thlər nə Kərsiti, njira Hyal nə nda tətəlna ndər Hyal kəra dədəwa.

² Kabangəkau, kalar njira nji nə nda sər məl, nda da njir məl thlər tsa'a miya dəfu.

³ Anə da, a'yi da sər tal ma hyi məliya da numa mai, ənga alaga alenyi njir məl numa anə da mai. Ənga jiri alaga nayi a'yi yu məl numa anə kərda mai.

⁴ Nayi sənibiya səra yi ndzana mai, ama alaga abangau, a'yi cabiya abər vazə da a'yi mai. Thlagə ənga kərnyi ngu məl numa anə da.

⁵ Agabangau, a sara hya məl numa anə nji tsu pəcir numar nda gəra da mai. Hya səkə pəci kəra Thlagəu nda sha shili. Ju nda cabiya ar babal səra ndə məlna dədəwa ənga ja cabiya səra ndə a vər dənga wu dəfuwa nda. Ar pəci ta ngə kalar ndə wu nda dləwuri fal nyi ara Hyal tsatsa'a aga səra nda nyi məliya.

⁶ Kabangəkau, wazha ama, sə kə yu na kau, a məliyar 'ya ar kəra kər'ya nayi ənga Apolusu aga tara ba ja dləwar hyi. Lagu kə nga hyu sən highiḅəri ara 'ya səra ləkakadə nana, abər, “Hya sara məl thlər a biya abanga səra tsətsəfə kə mai.” A sara ndə wu pama hyi a ḅwadzə ənga vanyi ndə a ndiya vanyi ndə wu pama 'ya mai.

⁷ Wa ngə məliya gə da pamə a ndiya vanyi nda? Mi ngə səra ara gau, kəra a'yi nji ngə nə ngə maya? Ma nji ngə nə ngau, ya, ara mi nga gə məliya ji da sər ḅwadza?

⁸ Kabangəkau, a uyar hyi kalar səra hyu yiwu. A ḅari hyi njir bərba njir gənnə! Gəra ənga 'ya a ḅar hyi

təl! Ənggəra yu cim, a ɗari hyi təl ənga jiri, aga mənə daɓaga səm təlkur kə ənga hyi patəu!

⁹ Ara wu ɗənga ɗa, Hyal a fiya 'ya ri, na'ya cama səsau, ənggər njira a gyu ndəla nji ənga dididi, njira nji thlana nda numə nə tau. Kəja 'ya a ɗari aga sər nggushi wu mwar duniya ənga wu mwar wal-adi'yar ənga nji patəu.

¹⁰ Arya Kərsiti a ɗar 'ya dza, ama nahyi nji hangə nga hyi wu Kərsiti! Nji kukufu nga 'ya, ama nahyi nji nənau! Nahyi nju gənggər hyi səli, ama na'ya nju gənggər 'ya səli mai!

¹¹ Shili ar pəci kə əshina ənga wuɓə ba ənga hili nga 'ya, kar hahal nga ar dza 'ya, ənga nja vər lə ɓwaɓwatə anə 'ya, na'ya nji gəra ənga ki ngau.

¹² 'Ya vər məl thlər gagaɗau ənga tsa 'ya. Ar pəcira nji shi'wa 'ya, ba 'ya shabiya ənga lə barka. Ma nji takasə 'ya, ba 'ya səsə'wuri.

¹³ Ma nju ndər nə ndza thləmə'r 'ya ba 'ya shadəwa ənga hangəkəl. Ba'anə shilar kabangəkau, a ɗari 'ya səra nja pəna ar dzəgau, ənga wu mwar njir duniya kə 'yi ɗa dzəgau.

¹⁴ Nayi a'yi a vər tsəfə sə'yar kau, aga ya həna səli'r hyi mai, ama aga ya tɗar himiya hyi, nahyi wazha kəra yu yiwu gagaɗau.

¹⁵ Alaga a'yi hyi ənga njir highiɓə gangə anə hyi wu Kərsiti, ama a'yi hyi ənga tada'yar gangə mai, arya wu Kərsiti Yesu nga yi ɗa ar viya tada ar kəra hyi lagu nə ndəshigu.

¹⁶ Agabangau, yu kədi hyi aga hya fa'abiya hiya yau.

¹⁷ Arya kə nga yi səwa hyi Timathlawusu, zər ɗa kəra yu yiwu, naja ndəra wu məl thlər Thlagəu tsa'a

miya dəfu. Ju sa dəngar hyi ar kəra nggyabiya da wu Kərsiti Yesu, kəra shili kakalə ənga sərə ya vər highiḡə ar kalar vira yi ndari ənga wu kalar daḡə dzə njir nu.

¹⁸ Alenyi nji wu pama hyi a dar njir ḡwadzau, ənggər tsu yu ḡəra sha shili ara hyi mai.

¹⁹ Ama yu ḡəra sha shili ara hyi kajangəkau, ma Hyal məliya, ba ya dzəgwa nggabiya a'yi kəl ndər nə nji ḡaḡal kər kə waci mai, ama tara wathləm culi dənama kəra a'yi ara nda.

²⁰ Ara təlkur Hyal a'yi sərə nju na ənga miya nga nyi waci mai, ama sərə nju məl ənga dənama ngau.

²¹ Mi ngə sərə hyu cim a da? Ya shili ənga wuda əndəga ya shili ənga yiwukur, əndəga ənga hudə shishi'wu nə mambəl ya?

5

Numa Ar Kəra Ndə Səsu

¹ Nji nar da, abər, səsukur a'yi wu pama hyi, culi kəra a ndiya kəra njira ḡəra sən Hyal a vər məl. Kəra təkəri ndə wu pama hyi wu pida ənga mala dənyi.

² Kəja hyu ḡwadzau, ama sər nggərau ngau anə hyi. Sərə tsa'a hya məl ca ngə hya həbiya ndər məl sə abangau sara wu pama daḡə dzər hyi.

³ Alaga kə a'yi yi əkkə'yi hyi wu kumər dzə kə mai, ama a'yi yi ənga hyi wu mambəl. A thlana nyir yi numa anə ndər məl najaka hudə sau wu thləmər Thlagər mən Yesu, ənggər a'yi yi əkkə'yi hyi kabangəkau.

⁴ Ar pəcira hyu daḡau, ənga a'yi yi əkkə'yi hyi wu mambəl, ənga dənama nə Thlagər mən Yesu a'yi əna,

⁵ hya lər culi ndə kə anə shatan aga kumər dzə nə bikau a tau, ba mambəl nyi a uya mbədaŋ ar pəcir shidar Thlagəu.

⁶ Bwadzər hyi a'yi sə mənəhə ngə mai. A'yi hyu səni abər thləlamə kushu ca ngu thləthləna ləgu dəfə wa?

⁷ Hya həbiya bikə kəra ənggər thləlamə hahal sara wu hyi, aga hya da nji mafəliyāngə kəra ənggər macikəl gəra thləlamə, ənggər kəra hyi kau. Arya Kərsiti, gamə nə lardur vəlna, ca nga nji həna sadaka ənga ja aya mən.

⁸ Agabangau, ta'yi mənə gu lardur mən, a'yi ənga thləlamə hahal mai, ca ngə sə ənggər səbə ndə wu dəfu ənga shishikur, ama nə macikəl gəra thləlamə, ca ngə sə ənggər nggya nə cicikur ənga jirkur.

⁹ A tsəfər hyir yi wu cama tsətsəfə da abər a sara hya dabə kər ənga nji səsu mai.

¹⁰ Ama nayi a'yi a vər ndər ar kəra nji səsu nə duniya kə mai, alaga njir suna ənga alaga njir dlərbau, ba njir nu katəu. Ma ar kəra nda nga ya vər ndər kau, a dəri kəl ba hya piyari duniya aga hya təkəbiya dzə ənga nda.

¹¹ Ama kabangəkau, ya vər tsəfə anə hyi abər, a sara hya dabə kər ənga ndər ngga kərnyi ndər nu, ama ndə səsu nga ja mai, alaga ndər suna, alaga ndər nu katəu, alaga ndər da nji, alaga ndər sa padlau, ənga alaga ndər həl. Ənga culi ndə kau, hya sara səm alaga sər səm ənga ja mai.

¹² Mi ngə nə da aga ya thla numa anə njira a'yi njir nu maya? A'yi anə njir nu nga hya kyaga məl numa wa?

¹³ Hyal ngu nda məl numa anə njira a'yi njir nu mai. “Hya kədləbiya ndər məl sə dəmwa'yi kau, wu

pama hyi.”

6

A Sara Njir Nu A Hə Kuvwar Nda A Dumwar Njir Pathla Mai

¹ Ma ndaliya hyi a'yi ənga sər kəpal wu dəfuwa ja ənga kuvwa nyi, ja sara hə nda nyi a dumwar njira gəra sən Hyal mai, ama a dumwar njir cici gə Hyal wa?

² Əndəga a'yi hyu səni abər nahyi njir cici gə Hyal ngu nda məl numa anə njir duniya wa? Ma nahyi ngu nda məl numa anə njir duniya, a'yi hyu sən məlma numa ar kəra sə kukushu'yar kə wa?

³ Dəm ya, a'yi hyu səni abər namən ngu nda məl numa anə waladi'yar wa? Ka dzəgwa də sər nggyabiya nə duniya kə nga ndiya ya?

⁴ Agabangau, ma a'yi hyi ənga kəpal ar kəra sə'yar kau, mi ngə də hyu ma'yi a dumwar njira gəra təkəri nda də vanyi sə wu mwar dabə dzə njir nu wa?

⁵ Yi na abangau, aga ja də sə səsəli anə hyi. Abari nga ja sən də abər ndə a'yi wu pama hyi kəra hahangə, kəra wu sən məlma numa wu pama njir nu mai ka?

⁶ Ama ba də, hyu hə kuvwar hyi a ndumwar njir pathla, njira a'yi njir nu mai.

⁷ Alaga ənggəra hyu hə kuvwar hyi a ndumwar njir pathla, a cabiyari abər a dər hyi njir dladla. A'yi kuji hya də njir vavazə wa? A'yi kuji hya də ənggər njira njir diya wa?

⁸ Ama kəja nahyi ngə dzəgwa də njir vazə njir, ənga hyi də njir diya njir, ənga tsu kəja hyu məl abangau anə zamər hyi.

⁹ Nahyi a'yi wu səni abər nji shishi wu uya gwu təlkur Hyal mai wa? Hya sara ngguta kərhyi mai, arya nji səsu ənga njir nu katəu, ənga njir dlənga mala ənga sal ndau, ənga shili kəra wu pida ənga shili kuvwar nda,

¹⁰ ənga njir həl, ənga njir suna, ba ənga njir sa padlau, ənga njir na ndau, ba ənga njir kwadashima, nandu uya gwu təlkur Hyal mai.

¹¹ Abangə ngə alenyi nji wu pama hyi saya da, ama a cina hyir nji, ənga a thləna hyir nji. Kə hyi da njira nji məliya nda nji tsapəu, wu thləməər Thlagər mən Yesu Kərsiti ənga lagur Mambəl Hyalər mən.

Fiya Dza Gau Ja Da Sər Dləvə Hyal

¹² A sən məl yi kalar sau, ama a'yi kalar sə ngə ənga dləwa dzə anə da mai. A sən məl yi kalar sau, ama a'yi yu da mafa anə kalar sə mai.

¹³ Nji məliya dəfau aga gwu ta, ta tsu aga pə dəfau, ama patəkura nda Hyal wu nda sana nda. Nji a'yi məliya dzə aga səsukur mai, ama anə Thlagəu, ənga Thlagə tsu anə dzau.

¹⁴ Hyal hya'ana Thlagəu sara vir tau lagu dənama nyi, abangə tsu nga ju nda hya'ana mən sara vir tau.

¹⁵ Nahyi a'yi wu səni abər dza hyi gashagashal nə Kərsiti ngə wa? Ya, abari nga hyu dzəgwa hər dza Kərsiti hya dabəya ənga nə zawar ka? Wu kyaga da mai!

¹⁶ A'yi hyu sənbiya abər kalar ndəra dabəər kərnyi ənga zawar a dər nda dzə zəmə wa? Arya tsətsəfə nga nyi abər, “Nji məthlə kau, ndu da dzə zəməu.”

¹⁷ Ama kalar ndəra dabəər kərnyi ənga Thlagəu, a dər nda nji zəmə wu mambəl.

¹⁸ Hya hwi sara ara nggyabiya nə səsukur. Arya kalar bikə kəra ndu məl a biyar ya kumər dza ja nga nyi, ama kalar ndəra məliya bikə nə səsukur, a məliyar ja bikə anə kumər dza ja.

¹⁹ A'yi hyu səni abər dza hyi Ki nə Mambəl Cici ngə wa? Mambəl kəra wu hyi, ara Hyal nga hyi dləwuri. Nahyi a'yi nə kərhyi nga hyi mai,

²⁰ a dəlbiya hyir nji ənga madiya sau. Agabangau, hya gənggər nyi səli anə Hyal ənga dza hyi.

7

Highiḅ Ar Kəra Hədzau

¹ Ar kəra səra hyi sayi tsəfər də tsu kadə ta, wu də mənəhəu ma ndə sən nggya gəra hə mala.

² Ama ta də səsukur a nyabiyar dzə wu hyi, ta'yi kalar ndə a hər mala nyi, kalar mala tsu ja hər sal nyi.

³ Kalar sal ja nyabiya salkur nyi wu dza mala nyi, mala tsu ja məl abangə anə sal nyi.

⁴ Mala a'yi naja ngu gəla dza ja mai, ama sal nyi. Abangə tsu, sal a'yi naja ngu gəla dza ja mai, ama mala nyi.

⁵ Hya sara ka kərhyi anə kərhyi mai, kəl ma hyi lari a dər tsa'a anə gyapəkura hyi nə pəci kushu, kəra hyu yiwu hya kədi Hyal. Alaga abangə tsu ma, hya sara səkari nə pəci gangə mai, a sara Shatan a uya lagur dzə hyi, ma ndaliya hyi gəra sən səsə'wuri.

⁶ Sə kə yi na kə patə sawara ngau, a'yi səra mbari kəl nja məl mai.

⁷ Yu cim abər patər nji nda də ənggər kəra yi kau, ama tsu kalar ndə a'yi ənga sə lələ kəra Hyal nə nyi, ndə kə ənga nənya sə ləlau, ndə ta tsu ənga nənyi.

⁸ Ama yi na anə njira gəra hər sal ənga njira gəra hər mala ba ənga mathləkə'yi təsal, wu ndiya ənga mənəhəu anə nda, ma ndə sən nggya sər nda ənggər kəra yi kau.

⁹ Ama ma nda nyi a'yi wu sən kəkəya kərnyı mai, wu ndiya anə nyi ja hər sal alaga ja hər mala, ara ja sara tau ənga cim mala alaga sal.

¹⁰ Kəja sər bəla anə hyi nahyi njira hərdzau, a'yi sara ara yi mai, ama sara ara Thlagəu. Mala a sara təkəbiya dzə ənga sal nyi mai.

¹¹ Ama ma ji təkəbiya dzau, ta'yi ja nggya sə nyi gəra hə sal, ma a'yi abangə mai, ta'yi ja bəra sha a ndəgya sal nyi ta. Sal tsu ja sara kədləna mala nyi mai.

¹² Anə nji kəra hyau, (Yi na, a'yi əngwar Thlagə mai), ma ndər nu a'yi ənga mala kəra gəra ndər nu, ya, mala nyi wu yiwu nda nggya sər nda, a sara sala nyi a kədlə nyi mai, bəgə nda nggya sər nda.

¹³ Ma mala kəra ndər nu tsu, a'yi ənga sal kəra gəra ndər nu, ya sala nyi wu yiwu nda nggya abangau, mala nyi a sara təkəbiya dzə ənga ja mai, ama nda nggya sər nda.

¹⁴ Arya sal gəra ndər nu kau, a dərı ja cıcau lagu mala nyi. Abangə tsu ngə mala kəra gəra ndər nu, a dər ja cıcau lagu sal nyi. Ma a'yi abangə mai wazhar nda wu də nji gəra cıcau, ama arya abangau a dər nda nji cıcau.

¹⁵ Ama ma ndəra gəra ndər nu wu yiwu ja təkəbiya dzə ənga mala alaga sal, ta'yi ja də, ndə a'yi

ar sə'yi hədzə kə mai, arya Hyal ngə ngga mənə wu nggya wu hudə pərtə nyi.

¹⁶ Nagə mala, wa sənə, ma gə məl abangau, tara ba ga shabiya sal ngau a shili wu mbəda? Alaga nagə sal tsu ma gə məl abangau, wa sənə, tara ba ga shabiya mala ngau a shili wu mbəda?

¹⁷ Kalar ndaliya hyi ja dumwa ənga nggya wu kalar nggyabiya kəra Hyal fuwa nyi a gwa, ja da ənggər kəra ja parangə kadivira Hyal ngga nyi ta. Ca ngə sər bəla kəra yu nə nyi anə patər dabə dzə njir nu.

¹⁸ Nja na, ma ndə a'yi kəra nji thlana nyi pəlzha kadivira ja da ndər nu, ja sara shabiya pəlzha nyi ənggər ndəra nji gəra thlana nyi pəlzha mai. Ətsu ndəra da ndər nu ama a'yi nji thlana nyi pəlzha mai, tsu ja bəra thla pəlzha mai.

¹⁹ Ndəra nji thla nyi pəlzha ənga ndəra nji gəra thla nyi pəlzha a'yi ca ngə sə mai. Səra ndiya patəu ca ngə bəlari dladə Hyal.

²⁰ Yau, kalar ndə ja nggya ənggər kəra ja kadivira Hyal ngga nyi.

²¹ Nagə mafa ar pəcira Hyal ngga ngə ya? A sara ga bəwakər anə kərngə mai. Ama ma lagu a'yi kəra ga sən bəliya kərngau, ba ga bəliya.

²² Ama kalar ndəra Thlagə ngga kəra mafa nga ja, ma ji da ndər nu, a dar ja kambər ndau wu Thlagəu. Ma tsu kambər ndə nga ja, kadivira ji da ndər nu, a dar ja mafa nə Kərsiti.

²³ Ənga madiya sə nga nji dəlbiya hyi, a sara hya bəra mbiya kərhyi wu mafakur mai.

²⁴ Nahyi zamə da ənga kwamə da'yar, kalar ndə ja nggya ənggər kəra ja kadivira Hyal ngga nyi, ba

ja nggya aga ja.

²⁵ Ar kəra wazha kwamathləkə'yi kəra gəra sən ndə sal, sər ɓəla a'yi kəra sara ara Hyal kəra ya nə hyi mai. Ama Hyal lagu təhudə nyi, ndəra məliya də yi də ndəra nju fiyafə əni, ca nga yu dzəgwa dəgabiya hyi dənga də.

²⁶ Arya culi nggyabiya kəra nji a gwa kabangəkau, yu nggani, a ndiya anə ndə ja nggya sə nyi abangau.

²⁷ Ndəra a hərdzau, bəgə ja nggya sə nyi. Ma tsu nagə a'yi hər mala alaga sal mai, a ndiya ga nggya sə ngə abangau.

²⁸ Ma nagə ndə hər mala, a'yi bikə mai. Ma nagə zəkwalagə hər sal, a'yi bikə mai. Patə abangau, njira hərdzau pəci kə əshina ndu gu nggyabiya nə dzadzaukur, ca ngə sərə yu yiwu ya həbiya hyi sara gwa.

²⁹ Sərə ya vər na kau, ca ngə, nahyi wazha ama, pəci a hyiri kushu. Mbar kabangəkau, bəgə njira ənga mathləkə'yi nda nggya ənggər mathləkə'yi a'yi ara nda mai.

³⁰ Njira vər sə'yinggu, nda də ənggər a'yi nda vər sə'yinggu mai. Njira vər caguli tsu, nda də ənggər njira vər tiwi. Njira vər dəl sau, nda də ənggər njira gərə sau.

³¹ Njir sən məl thlər ənga sər duniya, nda sara fə kəra nda a gu gwa mai. Ara duniya kəra mən wu səni kau, a vər tərabiya.

³² Yu yiwu hya də ənga kər papal ar kəra nggyabiya duniya. Ndəra gərə hər mala alaga sal ja vər dənga ənggərə ja sən pina huda Thlagəu.

³³ Ama ndəra ənga mala a'yi ja ənga kər papal mai, ara ju gal lagura ja sən uya sər duniya aga ja

pina huda mala nyi.

³⁴ Ənggau ju da ənga kər məməthləu. Ənga tsu mala kəra gəra ənga sal alaga kəra gəra saya sən ndə sal, ənga papalkur kər, ju sən ləri kərnyi cicau anə Thlagəu wu kumər dzau ənga wu mambəl. Ama mala kəra hər sal, ju gu dənga sə ənggəra ja sən pina huda sal nyi ənga ja uya sər duniya.

³⁵ Ya vər na abangau aga ja da sər dləwa hyi, a'yi aga ya gatsəna far hyi mai, ama aga hya uya nggya papalkər kəra hya sən nu Thlagəu gəra ənga təkə kər.

³⁶ Ma ndəra nggani abər a'yi ju məl səra tsa'a anə mala mbamba nyi mai, ma cim nə sal kə da gagadau, ba sala nyi ləri ja kyaga hər mala nyi, ja məl səra tsatsa'a anə nyi. Naja a'yi məliya bikə mai, ba ja hər mala nyi.

³⁷ Ama ma nda nyi a həri wu dəfuwa ja aga ja nggya sə nyi abangau, ama ndə a'yi ciwa nyi aga ja nggya abangə mai, ənga ju sən kəkəya kərnyi, ənga ji mbiya wu dəfuwa ja naju hə nyi mai, ndə kə tsu a məliyar ja səra tsatsa'a.

³⁸ Agabangau, ma ndəra hər zəkəwamalagə anə kərnyi, a məliyar ja sə mənəhəu. Ama ndəra wu sən mbiya dəfu, ba ji piyari hə mala, naja nga ndiya.

³⁹ Mala əgyakida sal nyi nga ja wu nggyabiya nyi ma sala nyi ənga pi. Ama ma sal nyi tau, ju sən hər vanyi sal kəra ju yiwu, ama sala nyi a da ndər nu Hyal.

⁴⁰ Ama wu tsamə da, wu da tsa'a ma ji sən nggya sə nyi abangau. Yu nggani tsu wu Mambəl Hyal nga yu ndər kau.

8

Sər Səm Kəra Nji Thlana Nyi Anə Katəu

¹ Yu yiwu ya ndər anə hyi ar kəra sər səm kəra nji thlana nyi anə katəu. A'yi mən patə ənga sənbiya sə gagadau. Sən sər mən kau, ca ngə hana kəra mən, ama yiwukur ca ngə mbiya mən baʒal wu mbərsa.

² Kalar ndəra nggani abər a sənbiyar ja sau, alaga abangau, naji sənbiya səra ja kyaga səni mai.

³ Ama ndəra vər yiwu Hyal naja ngə ndəra Hyal wu səni.

⁴ Ma mən ndər ar kəra səm sər səm kəra nji thlana nyi anə katəu, a sənər mən abər katə a'yi ja ar viya vanyi sə mai. A sənər mən tsu abər vanyi hyal a'yi mai kəl Hyal, arya Hyal zəmə nga ja.

⁵ Alaga kə nju na, hyal hyal'yar a'yi nda gangəu, kəra a dəməlmau ənga kəra a gyu'yi, ənga tsu thlagə thlagə'yar a'yi nda gangəu,

⁶ patə abangau, mənəu sənbiya Hyal zəmə nga ja. Naja ngə Tada, ndəra duniya patəu shili sara dara ja, kəra namən ma a vər nggya aga ja, Thlagə tsu zəmə nga ja, ca ngə Yesu Kərsiti, lagu nyi ngə patər sə shili, ənga lagu nyi nga mənə vər nggya.

⁷ A'yi patər nji nga vər sən najaka sə mai. Alenyi nji a tsəliyar nda dzə ənga nggya katəu, ma ndə səm səra nji thla nyi anə katəu, ndu nggani abər nu hyal nga nda a gwa, dəngar nda kəra tətəwa ngə fuwa nda wu səli.

⁸ Dəfau a sən hər mən a shili wu mwar Hyal mai. Ma mən səm, a sən dləwar mən mai, ma mən piyari, sə a'yi kəra ja sən cakər mən mai.

⁹ Ta'yi hya nggya ənga ʒəla, a sara kambəkurər hyi kau, ja sara də sər thlə hi anə nji tətəwa mai.

¹⁰ Ara ma ndəra tətəwa wu dənga lar nga vər səm sər səm kəra nji thlana anə katəu, nagə ndəra wu sənbiya sau, a'yi gu tsətsəkür nyi, ba ja səm səra nji thlana nyi anə katə wa?

¹¹ Arya sənbiya sə ngə kau, ba zamə ngə kəra tətəwa wu dənga ndəra Kərsiti tə aya ja, ba ja dla.

¹² Ma gə məliya nyi bikə anə zamə ngə'yar, lagur tsətsəkür nda aga nda məl səra dəngar nda gəra mbar nda məl, a məliyar gə bikə anə Kərsiti.

¹³ Ma də abər səm kum nga sən məliya ba zamə də a thlər hi, a ndiya anə də ya nggya gəra səm kum, a sara ya fuwa zamə də ja thlər hi.

9

Səra Tsa'a Nja Nə Nyi Anə Cama Səsau

¹ A'yi yi kambər ndə wa? A'yi yi cama səsə wa? A'yi nayi ənga kərda ngə lari Thlagər mən Yesu ənga liya yi wa? A'yi aya thlər də nga hyi də njir nu Thlagə wa?

² Ma a'yi yi də cama səsə anə alenyi nji mai, ama anə hyi cama səsə nga yau, aya nahyi ənga kərhyi sakida nga hyi abər cama səsə nə Thlagə nga yau.

³ Kəja shadəwa də anə njira vər kəpal dənama nə təlkur də.

⁴ A'yi 'ya kyaga uya sər səm ənga sər sa wa?

⁵ A'yi 'yi də tsa'a aga 'ya bə əkkə'yi mathləkə'yir 'ya kəra njir nu ənggər kəra alenyi cama səsə'yar ənga zamiya Thlagə 'yar ba Kefasu a vər məl wa?

⁶ Əndəga kəl nayi ənga Barnabasu nga kyaga məl səra wu sən səmənə 'ya ya?

⁷ Wa thləmə culi soja kəra a miya pa nga bəra səmənə kər nya? Wa thləmə ndər zəwa kəra a'yi sən

səm səra ji zəwa maya? Wa thləmə ndər bəla kəra a'yi ja sən uya u'wa thla kəra ja vər bəla maya?

⁸ Ndər da kə ya, wu ndəndəkur nga yu na ya? Əndəga hyu nggani abər dladə nə Musa a'yi na abangə maya?

⁹ Arya dladə Musa a nanari abər, “Ga sara mba njuwangə wu miya thla zəwa ndal ədla ma ja vər məl thlər dəgə uhi ar lar mai.” Hyu nggani thla zəwa ndal ədla ngə Hyal a vər dənga ma ju na abangə kə ya?

¹⁰ A'yi ar kəra mən nga ja vər ndər ənga hangə wa? Angə, aga mən nga nji tsəfəri, aga ndəra vər zəwa fa ənga ndəra vər fa'a sə asi aga gyapə nda nda uya fər kər nə uya akkəri nə sə zəzəwa.

¹¹ Ta a dəri a thləkanar 'ya culi nə mambəl wu hyi, a'yi 'ya kyaga fa'a sər səm sara ara hyi wa?

¹² Ma hya vər dləwa alenyi njira vər tətəlna ndər Hyal anə hyi, a'yi 'ya kyaga uya dləwa dzə ara hyi a ndiya nda wa?

Ama na'yi na kəl hya məl abangau anə 'ya mai. Arya a ndiya anə 'ya, 'ya səsə'wuri kalar sau, a sara 'ya shili ənga sər da lagu anə Ndəshigu nə Kərsiti.

¹³ A'yi hyu səni abər ya kalar ndəra vər məl thlər wu Ki Hyal ju uya sər səm nyi wu lər sə kəra nji tsəmiya wu Ki Hyal kə wa? Ənga a'yi njira vər məl thlər ar bagadi tsu, nda vər uya sər səmər nda wu səra nju thla ar bagadi kə tsu wa?

¹⁴ Abangə nga nyi tsu, Hyal nana abər kalar ndəra vər tətəlna ndəshigu ja uya dləwa dzau sara ara njira vər səm barka ndəshigwa nyi.

¹⁵ Wu patəkura nyi nayi saya ta'yi ar kəra səra kyaga yi mai. A'yi ya vər ndər kau abər aga nja məl

anə da abangə mai. Nə jirkura nyi a ndiya anə da ya tau a mwara ya tini bʷadzə nə tətəlna ndəshigu kau,

¹⁶ alaga kə tətəlna ndəshigu a'yi da sər bʷadzə anə da mai. Arya Hyal ngə tsəkur da aga ya məl. Sər təhudəu anə da ma a'yi yi tətəlna ndəshigu mai.

¹⁷ Ma sə kə ya vər məl kau, wu dənamar kərda nga ja, ya kyaga yiwu gal nja kina da. Ama ma sə kə ya vər məl kau, wu dənama kərda nga nyi mai, Hyal ənga kərnyi ngə nə da sər məl.

¹⁸ Mi ngə akkəri da ja? Lagu kəra yu uya aga ya tətəlna ndəshigu gəra dləwu gənna a gwa, ca ngə akkəri da. Ca ngə səra da, a'yi ya vər yiwa səra tsa'a aga yi mai.

¹⁹ Alaga kə kambər kərda nga yau, a'yi yi əgya kida ndə mai, ama yi məliya kərda mafa anə nji patəu aga ya shabiya nji gangə a shili ara Kərsiti.

²⁰ Ma yi wu pama njir Yahudiya ba ya da ənggər njir Yahudiya aga ya shabiya nda shili wu Kərsiti. Ma yi əkkə'yi njira vər nu dladə njir Yahudiya ba ya nggya əgya kida dladər nda alaga kə a'yi yi əgya kida dladə mai. Ya vər məl abangau aga ya həbiya njira əgya kida dladəu a shili ara Kərsiti.

²¹ Ma ya vər nggya əkkə'yi njira gəra səni Hyal njira gəra nu dladə nə njir Yahudiya, nayi tsu ba ya da ənggər njira gəra vər nu dladəu, ama wu patəkura nyi, nayu shini nyi yi anə dladə Hyal mai, ya vər bəlari dladə Kərsiti, aga ya tədər nda a shili ara Kərsiti.

²² Ma yi əkkə'yi njira tətəwa ba ya da ənggər njira tətəwa, aga ya sən shabiya nji tətəwa a shili wu Kərsiti. A dar yi kalar sau anə kalar nji aga ya shabiya alenyi nji a shili wu mbədəu alaga abari.

²³ Patər sərə ya vər məl kau, aga ya tətəlna ndəshigu nga nyi ba aga ya dzəgwa jigəwa dzau wu barka nyi.

²⁴ A'yi hyu səni abər njira vər hwi pəpəra gangə nga nda, ama kəl ndə zəmə ngu nda uya səmku təlkur wa? Pəpəra mə mənəhəu aga uya səmku təlkur.

²⁵ Kalar njir pəpəra ndu hwathliya dza nda mənəhəu. Ndə hwathliya dza nda kau, aga nda uya akkəri kəra gəra səkari. Ama namən nər mən, mənəu məl aga mənə uya akkəri kəra wu nggya ba'anəwa.

²⁶ Ya vər hwi də a'yi ənggər ndə kəra gəra jigadəma mai. Kwakwadzə də a'yi ənga yambadə nga ya vər məl mai.

²⁷ Ama ya vər hwathlə dza yau ənggər kəra njir gwa hwi pəpəra wu məl, aga ya gəliya kərda. A sara ja də ayukudə yi tətəlna ndər Hyal ba ya nda tini uya akkəri də.

10

Tədə Himi Ar Kəra Nggya Dədəməu Nə Njir Iziray-ila

¹ Hya sara fari ənga nggyar əjir mən kəra saya də a gwar tagə mashi ta mai, wazha ama. Patəkura nda ndə ɓau əgya kida dlama kəra a vər ca lagu anə nda, ənga patəkura nda tsu ndə ɓau kə ndə tərabiya a gwar tsadau.

² Wu dlama ənga wu tsadau nga nji hər nda bəbətizəma aga nda də njir nu Musa.

³ Patəkura nda, ndə səm sər səm culi zəm sara dagə Hyal,

⁴ ənga patə nda tsu ngə sa 'yimi culi zəm sara dagə Hyal. Ndə sa 'yimi kau, sara wu mə kəra a vər

ma'yi əkkə'yi nda, mə sara dagə Hyal kəra ca ngə Kərsiti.

⁵ Alaga abangau, huda Hyal a'yi pipida ənga badəgala nda mai, ca ngə səra da ji dlədləna nda zərɓə a gwar tagə mashi.

⁶ Sə'yar kə darkər aga tədar himiya mən, a sara mənə caguli aga məl sə dəmwa'yi mai ənggər kəra ndə məl ta.

⁷ A sara hya da njir nu katəu, ənggər kəra alenyi nji wu pama nda məl ta mai. Ənggər kəra ləkakadə nana, abər, “Ndə caguli, ndə gu mini, ənga ba ndə gu fəl nə səsukur.”

⁸ A sara mənə məl səsukur ənggər kəra alenyi nji saya məl ta mai, kəra shili ənga asar tau, kəra dləna nji dubu məthləkumunyi apə makəru wu pəci pathləu.

⁹ A sara mənə fuwa Thlagəu wu dzə mai, ənggər kəra alenyi nji fuwa nyi wu dzau, kəra məliya pabə ngganggaləna nda kə ndə tau.

¹⁰ A sara mənə jijiga miya ənggər kəra alenyi nji məl ta mai, ndə jijiga miya ba waladi tau shida ka sa dlədləna nda.

¹¹ Sə'yar kə darkər anə nda aga ja da sər highiɓau. Nji tsəfəya nda aga ja tədar himiya mən, namən njira vər nggya ləhəu wu shilir jomə nə zaman.

¹² Agabangau, ma gə nggani abər a ta'yir gə ɓaɓalu, ga hangəkəl ga sara dla.

¹³ Dzə a'yi kəra gə gu gwa, kəra pamə a mwara kəra nju tərabiya a gwa mai. Arya Hyal ndəra tsa'a miya dəfu ngau, ju piyari dzəbiya dzau kəra wu ndiya dənəma ngə mai. Ma gə gu dzəbiya dzau, ju canə ngə lagur biya aga ba ga səsə'wuri.

Thla Sau Anə Katəu Ənga Sər Səm Thlagəu

¹⁴ Agabangau, nahyi bazhir 'wa da 'yar, hya hwi ara nu katəu.

¹⁵ Ya vər ndər anə hyi, nahyi njir jigadəma. Dəngabiya mə sə anə kərhyi mənəhəu, tara sə kə ya vər na kau jijiri nga ja.

¹⁶ Ma mən sa wu kyakiwa nə barka, kəra mən wu kədi Hyal aga ja fənggər barka ar kəri, a'yi mən dabəya dzau wu mashi Kərsiti kə wa? Ənga ma mən bəbələwa macikəl nə Thlagəu kə mən səmku, a'yi mən dabəya dzau wu dza Kərsiti kə wa?

¹⁷ Ta da macikəl kə zəmə nga ja, namən kəra gangəu, a dar mən dzə zəmə tsu, a'ya patəkura mən, a səmər mən sara wu macikəl kau.

¹⁸ Hya dəngabiya sə ar kəra njir Izirayila. Ar pəcira ndə səm sər səm kəra nji thlana ar bagadi kau, sadaka kə a'yi məliya nda ndə da njir məl sə zəmə wa?

¹⁹ Mi nga yu yiwu ya na? Abər səra nji thlana nyi anə katə a'yi ja ar viya vanyi sə ya? Əndəga katə ənga kərny i a'yi ja ar viya vanyi sə ya?

²⁰ Awau, alaga kushu, ya vər na abər səra nji thlana nyi anə katəu, nə mambəl dəmwa'yi ngau, a'yi nə Hyal ngə mai. Agabangau, yu yiwu hya da njir nu mambəl dəmwa'yi mai.

²¹ Nagə wu sən sa sara wu kyakiwa nə Thlagəu, ba ga bəra sa sara wu kyakiwa nə mambəl dəmwa'yi mai. Nagə wu sən səm sara wu sər səm nə Thlagəu, ba ga bəra səm sara wu sər səm nə mambəl dəmwa'yi mai.

²² Mən wu yiwu mənə hya'a par madəkur anə Thlagə ya? Hyu nggani abər hyu ndiya nyi ənga dənəma ya?

Sə Patəu Ja Da Aga Dləvə Hyal

²³ Alenyi nji wu pama hyu na, abər, “A piyari mənər nji mənə məl kalar sau,” ama a'yi kalar sə ngə ənga dləwa dzə mai. “A piyari mənər nji mənə məl kalar sau,” ama a'yi kalar sə nga sən cakər ndə mai.

²⁴ Ga sara gal kəl sərə tsa'a anə kərngə mai, ama sərə tsa'a anə kuvwa ngə tsu.

²⁵ A sən səm gə kalar kum kəra gə uya ar sugu ənga kər papal, a'yi kəl gə yiwabiya tara sara mani nga nyi shili mai.

²⁶ Arya ndər Hyal na, “Duniya kau, nə Thlagə ngau ənga kalar sərə a gwa.”

²⁷ Ma ndəra a'yi ndər nu mai ngga ngau aga səm sər səm, kə gə hənggəri, ga səm kalar sərə ji fiya a mwa ngau, a'yi kəl gə yiwabiya sə a gwa mai, ara ga sara da ənga gəra kər papal.

²⁸ Ama ma vanyi ndə nar ngau, abər, “Sər səm kə anə katə nga nji thlana,” ga sara səm mai, arya dənga ndəra na sə kau anə hyi ənga tsu aga ja da ənga kər papal.

²⁹ Sərə ya vər na kau, ca ngə nggya kər papal nə vanyi ndə kau, a'yi nə ngə mai. Ara mi ngə kambəkur da a sən kar nggya kər papal anə nda?

³⁰ Ma yi dləwuri sər səm wu usaku anə Hyal kə yi səmku, ara mi nga hyu bəra vazə da?

³¹ Agabangau, kalar sərə hyu məl alaga səm ənga sa, hya məl aga kadakadarkur nə Hyal.

³² Ga sara da sər thlə hi anə ndə mai, tara njir Yahudiya alaga njira a'yi njir Yahudiya mai ənga alaga dabə dzə njir nu.

³³ Nayi ənga kərda ya vər məl kalar sau aga ya pina huda kalar ndau. A'yi sərə wu pina huda kərda mai, ama sərə mənəhəu anə nji gangəu, aga nji nda uya mbəda.

11

¹ Fa'abiya mə hiya yau ənggər kərə yi fa'abiya hiya Kərsiti.

Highibau Ar kərə Dləvə Hyal Ənga Kər Zazadau

² Ya vər fal hyi arya nahyi fari da mai, ənga hya vər nu sərə yi highibər hyi patəu, ənggər kərə yi highibər hyi.

³ Ama sə a'yi kərə yu yiwu hya səni. Ndəra dəgal ar kərə kalar sal ca ngə Kərsiti, ndəra dəgal ar kərə mala tsu ca ngə sal nyi, ənga ndəra dəgal ar kərə Kərsiti ca ngə Hyal.

⁴ Kalar sal kərə a vər kədi Hyal ənga na ndərhaha ənga kərə ja zazadau, a didanar ja kərə ja.

⁵ Ənga kalar mala kərə a vər kədi Hyal ənga na ndərhaha ənga kərə ja papahau, a didanar ja kərə ja, kakal ənggər a sənər ja shishir kərə ja.

⁶ Ma mala a'yi mbana kərə ja mai, kəl ba ja sənə shishir kərə ja. Ama ma da sə səsəli anə nyi ma ji sənə shishir kərə ja kau, ya ba ja zadər kərə ja.

⁷ Sal ja sara zadəri kərə ja mai, arya sal shangguda Hyal ngau ənga naja nga vər cabiya kadakadarkur nə Hyal. Mala tsu ju cabiya kadakadarkur sal.

⁸ Arya ndə sal nə tanggərma a'yi ji biya sara wu mala mai, ama mala ngə biya sara wu ndə sal.

⁹ Sal a'yi nji məl nyi anə mala mai, ama mala nji məliya nyi anə sal.

¹⁰ Arya kau, mala ja zadər kəra ja, kəra wu cabiya anə waladi ənga nji abər əgya kida sal nga ja.

¹¹ Wu Thlagəu, mala a'yi ja ar kərnyı mai, sal tsu a'yi ja ar kərnyı mai.

¹² Ənggər kəra mala tanggərma biya sara wu ndə sal, sal tsu mala ngə yabiya nyi, ama patər nji sara wu Hyal ənga ndə biya.

¹³ Hya tsambiya, a dər tsa'a anə mala ja kədi Hyal ənga kəra ja papahə ya?

¹⁴ A'yi hyu sənbiya abər ma ndə sal piyari shishir kəra ja tuməu, a dər sə səsəli anə nyi wa?

¹⁵ A'yi piyari shishi tumə ar kər ca ngə wu shili ənga kadakadarkur anə mala wa? Arya a nə ndar nji shishi tuməu, aga ja dā sər zadə kər anə nda.

¹⁶ Ma ndəra kəpal abər sə kə a'yi dā tsa'a anə nyi mai, ya nar nyi abər vanyi highiḃə a'yi kəra 'yu səni a ndiya kə mai, abangə nga nyi anə patər daḃə dzə njir nu tsu.

Ənggəra Nju Səm Sər Səm Nə Thlagəu

¹⁷ Wu highiḃə kəra yu lə anə hyi kau, sə a'yi ya sən faliya hyi ar kəri mai, arya ma hyu daḃə dzau a'yi aga mənəhəkur mai, ama aga dəmwa'yikur nga nyi.

¹⁸ Sə tanggərma, ya vər nggari abər ma hyu daḃau ar viya daḃə dzə njir nu, paməpaməkur a'yi wu pama hyi. Ndəra nyi tsu, ənggər jiri a'yi a gwa kukushu.

¹⁹ Jijiri kəl paməpaməkur a dā wu pama hyi ka-bangəkau, aga nja sənbiya njira Hyal dləwuri wu pama hyi.

²⁰ Ma hyi daḃau aga sər səm Thlagəu, a'yi sər səm Thlagə nə jijiri nga hyu səm mai.

²¹ Arya alenyi nji wu hyi ndu caguli aga səm nər nda sər səm, gəra nga səkə alenyi nji. Arya kau, ba alenyi nji a sha a ndu ki ənga wuḅau ama alenyi nji tsu nyinyau, nyi ənggər ənga padlau.

²² Mi ngə abangə ja, ki a'yi ara hyi kəra hyu səm ənga sa a gwa wa? Əndəga hyu yiwu hya didana daḅə dzə njir nu Hyal ənga hya həna səli njira gəra sə ara nda ya? Mi nga ya sən na ja? Abər aga ya faliya hyi abər hyi məliya sə mənəhə ya? Yu fal hyi alaga kushu mai.

²³ Səra yi dləwuri ara Thlagə ənga kərnyı ca nga yi nər hyi kau, əvu'yi kəra nji pəlna nyi pəzhi, kə Thlagə Yesu həri macikəl,

²⁴ kə ji lər usaku anə Hyal, ba ji ḅəḅələwa, kə ji nə nyi anə zəmbəlma nyi'yar, ji na, “Najakau, kumur dza yi ngau, kəra nji ləri aga hyi, məla mau abangau, aga hya dəngari ənga yau.”

²⁵ Abangə tsu nga ji həri kyakiwa 'yimir wur in-abi, ayukuda sər səm nə wagəu, kə ji na, “Kyakiwa kau, naja ngə alkawal mbamba mafəliyangə kəra Hyal mbiya ənga mashi ḁa. Məla mau abangau, kalar pəcira hyu sa sara wu kyakiwa kau, hya sa, aga hya dəngari ənga yau.”

²⁶ Kalar pəcira hyu səm macikəl kau, ənga hyu sa sara wu kyakiwa kau, hya vər hə'una tər Thlagəu, kəl ji ḅəra sha a shili.

Səm Sər Səm Nə Thlagəu Gəra Tsambiya Dzau

²⁷ Kalar ndəra səmku macikəl ənga sa sara wu kyakiwa wu lagu kəra gəra shili ənga gənggər nyi sili anə Thlagəu, a məliyar ja bikə anə dzə ənga mashi Thlagəu.

²⁸ Ca ngə sərə də kəl ndə a tsambiya kərnyi mənəhəu kadivira ja dzəgwa səm macikəl ənga sa sara wu kyakiwa.

²⁹ Ma nangə ndə kəra səm ənga sa, ma a'yi gə ndəra hakəra dza Kərsiti mai, a səmkur gau ənga sahur gə numa nə Hyal anə kərngau.

³⁰ Ca ngə sərə də nji gangəu wu pama hyi də kukufəu ənga nji gangəu wu pama hyi uya shilgəu, ənga alenyi nji tsu tənəkər.

³¹ Ama ma mən tsambiya kərmən ənga jiri, tsu vanyi numa wu bəra də ar kəra mən mai.

³² Ma Thlagə nga vər məl numa anə mən, namən tsu mən wu uya hwathlau, a sara nja nda thlana mən numa əkkə'yi njir duniya.

³³ Nahyi wazha ama, ma hyu daḅau aga hya səm sər səm nə Thlagəu, bəgə hya səkəbiya kərhyi.

³⁴ Ma wuḅə a vər tə ngau, ga səm sər səm a ndu ki kwatahəu, a sara daḅə dzər hyi ja shili ənga numa a da gəra hyi.

Ma yi sha shili, ba ya sa dəgabiya hyi alenyi sə kəra hyau, sər məl.

12

Lə Sə Ləlau Nə Mambəl Ciciu

¹ Ar kəra lə sə lələ nə Mambəl Cici ja, wazha ama, yu yiwu hya nggya ənga fədəngəkər mai.

² Hyu səni ar pəcira hyi gəra njir nu Hyal, pəci gangəu, nji nggutana hyi aga hya cana lagu nə jijiri aga hya nu katə kəra gəra ənga pi.

³ Agabangau, yu yiwu hya səni abər, ma ndəra na abər, “Yesu ndə shishi'wu ngau,” nda nyi a'yi wu ndər lagu Mambəl Hyal mai. Ətsu ma ndəra

na abər, “Yesu Thlagə ngau,” lagu Mambəl Cici ngə ndə ka vər ndər.

⁴ Lə sə lələ paməpamə gangə a'yi, ama Mambəl zəmə kə ngu lau.

⁵ Thlər Hyal paməpamə gangə a'yi tsu, ama anə Thlagə zəmə nga nju məl.

⁶ Ənga thlər məl paməpamə a'yi gangə tsu, ama Hyal zəmə kə ngu lə dənama anə nda patəu.

⁷ Lə sə lələ nə Mambəl nga nji nə nyi anə kalar ndə aga mənə uya sərə mənəhəu a gwagwa.

⁸ Anə vanyi ndə nji nə nyi lagu Mambəla nyi highiḃə nə hahangəkur, ənga anə vanyi ndə tsu, lagu Mambəla nyi nga nji nə nyi highiḃə nə sənbiya sau,

⁹ Ənga anə vanyi ndau, mbərsa lagu Mambəl kau, ənga anə vanyi ndə tsu, lə sə lələ nə shiləgəbiya ndə lagu Mambəla nyi,

¹⁰ Ənga anə vanyi ndə tsu, dənama məl sə dədəgur, ənga anə vanyi ndə tsu, na ndərhaha, ənga anə vanyi ndau, sənbiya paməpaməkur nə mambəl'yar, ənga anə vanyi ndə tsu, ndər ənga ḃəhə miya paməpaməu, ənga anə vanyi ndə tsu, shabiya ndər ḃəhə miya paməpaməu.

¹¹ Patə sə'yar kau, Mambəl zəmə kə nga vər lau anə kalar ndau, tsatsa'a ənggər kərə ju yiwu.

Gashal Gashal Nga Mən Wu Dzə Pathləu

¹² Ənggər kərə dzə zəmə ngau, ənga gashal gashal gangəu, alaga kə gashal gashal a'yi gangə ama dzə zəmə nga nda. Abangə tsu nga nyi wu Kərsiti.

¹³ Ara nji məliya mən bəḃətizəma patə lagu Mambəl zəməu, a vu dzə zəməu, alaga njir Yahudiya, ənga njira a'yi njir Yahudiya mai, alaga

mafa'yar ənga kambər nji, patəkura mənə dləwuri mən Mambəl zəmə kau.

¹⁴ Dzə a'yi gashal zəmə mai, ama gashal gashal gangəu.

¹⁵ Ma hi sən na, “Arya nayi a'yi tsi mai, a'yi yi gashala dzə mai,” a'yi a sən məliya nyi ja də pamə ara dzə mai.

¹⁶ Ma himi sən na tsu, “Arya nayi a'yi li mai, a'yi yi gashala dzə mai,” a'yi a sən məliya nyi ja də pamə ara dzə mai.

¹⁷ Maja bər dzə də patə li, lagu mani nga mən wu nggar sa? Maja bər dzə də patə himi, lagu mani nga mən wu thlar sa?

¹⁸ Nggara mə ja, Hyal ngə pədləya gashal aga dzau, kalara nda ənggər kəra ju yiwu.

¹⁹ Maja bər dzə gashal zəmə ngau, əmani ngə dzə wu dzəgwa də?

²⁰ Ama jijiri gashal gashal a'yi gangəu, ama dzə zəmə pathlə nga ja.

²¹ Li a'yi wu sən na anə tsi, abər “Dzau də a'yi ənga gə mai!” Ənga tsu kər a'yi wu sən na anə hi abər, “Dzau də a'yi ənga hyi mai!”

²² Abangə nga nyi mai, gashal gashal kəra hyu nggani nanda ngə kukufə kau, sə a'yi nja sən məl gəra ənga nda mai.

²³ Gashal gashal kəra mən wu həri a'yi nda ənga kadakadarkur gagadə mai, nanda nga mən wu har nda zhaḃi mənəhəu. Abangə tsu, gashal gashal kəra nja kyaga lari ar babal mai, ca nga mənə shir mənəhəu,

²⁴ ama gashal gashal kəra ar babal, nji a'yi wu shi nda mai. Ama Hyal ənga kənyi ngə dəḃəri gashal

gashal'yar kə patə abangau, aga kalar gashal gashal kəra gəra ənga kadakadarkur nda uya.

²⁵ Hyal ngə məliya abangau, ara paməpaməkur a sara də wu dzau, aga kalar gashal gashal nda dləwar kərnda wu lagu zəməu.

²⁶ Ma gashal zəmə gu bwaḃwatəu, patər gashal gashal ngə gu bwaḃwatə kə əkkə'yi ja. Ma gashal zəmə uya wahau, patər gashal gashal nga caguli əni.

²⁷ Nahyi, dza Kərsiti ngau, ənga kalar ndə wu pama hyi ar viya gashal ngau.

²⁸ Hyal ənga kərnyi a cadəbiyar ja nji wu daḃə dzə njir nu, tangərma ca ngə, cama səsə'yar, məthləkura nyi ca ngə, nabi'yar, nə makərkura nyi ca ngə maləm'yar, ənga njir məl sə dədəgur, ənga njir shiləgəbiya nji, ənga njir dləwa nji, ənga njir tədəmwa, ənga njir ndər ənga dəhə miya paməpamə'yar.

²⁹ Patər nji ngə cama səsə'yar ya? Patər nji ngə nabi'yar ya? Patər nji ngə maləm'yar ya? Patər nji ngu sən məl sə dədəgur ya?

³⁰ Patər nji ngu sən uya lər sə nə shiləgəbiya nji ya? Patər nji ngu sən ndər ənga dəhə miya paməpamə'yar ya? Patər nji ngu sən shabiya ndər dəhə miya paməpamə ya?

³¹ Ama sər cim ca ngə ga uya lə sə lələ kəra ndiya. Nayi tsu yu nda cabiya hyi lagu kəra ndiya patəu.

13

Lagur Yiwudzau

¹ Ma yu ndər ənga dəhə miya nji ənga dəhə miya waladi, ama yiwudzə a'yi ara yi mai, nayi ənggər

tatangə kəra nju tsa ngau, alaga kangga kəra wu tiwi ngau.

²Ma yu sən na ndərhaha ənga yu sənbiya sə ar kəra patər səra dədəwa ənga patər sənbiya sau, ba ma yi ənga mbərsa kəra wu sən jahəna mau, ama yiwudzə a'yi ara yi mai, sə kurthlə nga yau.

³Ma yi təkəna kalar səra ara yau anə nji dādali, ənga ma yi lər kərda aga nja ngyina da ənga u'u, ma yiwudzə a'yi ara yi mai, akkəri a'yi kəra yu uya a gwagwa mai.

⁴Yiwudzau ca ngə mba dəfu ənga ki'wakur. Yiwudzau, a'yi ənga da shishi mai, ənga bwadzə mai, ba ənga hakər mai.

⁵Yiwudzə a'yi ənga kulangəkur mai, ba ənga yiwu kərnyı mai, ənga ndzə hüdə kusakusa mai, ənga səbə ndu dəfu mai.

⁶Yiwudzau, a'yi wu caguli wu dəmwa'yikur mai, ama ju caguli wu jirkur.

⁷Yiwudzə wu nggya cimu ənga capi, cimu nga ju hənggəri ənga nji, cimu nga ja ənga fər kər, cimu nga ja ənga səsə'wu sau.

⁸Yiwudzau, wu nggya ba'anuwa. Ndərhaha nənyi, ju səkari mai, ənga ndər ənga dāhə miya paməpaməu tsu, ju tərabiya, ənga sənbiya sə tsu, ju kudau.

⁹Sən sər mən a'yi nyabiya dzə mai ənga ndərhar mən tsu, a'yi nyabiya dzə mai.

¹⁰Ama ar pəcira səra gəra nyau, nyabiya dzau, patər səra gəra nyau, wu kwaya ar lagu.

¹¹Ar pəcira yi zər, yu ndər zəzər, dənga da ənggər nə zər, jigadəma da ənggər nə zər kushu. Ama ta yi hau, ba yi pəna kalar sə nə zərkur.

¹² Kabangəkau, mən wu tsamə sə lələfuru, ənggər kəra mən wu tsamə sə a gwar 'yimi,* ama mən wu nda lari sə wu bama ənga bama camə gagadau. Kabangəkau, sən sə də gashal gashal nga nyi, ama yu nda sənbiya sə ar babal, ənggər kəra Hyal wu sənbiya də.

¹³ Sə makər kəra wu nda nggya ba'anuwa, ca ngə mbərsa, ənga fər kər ba yiwudzau, ama kəra ndiya nda patəu, ca ngə yiwudzau.

14

Lə Sə Lələ Nə Ndərhaha Ənga Ndər Ənga Dahə Miya Paməpaməu

¹ Ta'yi wuḅə yiwudzau, a də cimər hyi, ənga hya də tsu njir cim sə lələ nə Mambəl Cicau, nja na ma hya cim sən ndərhaha.

² Arya ma ndəra vər ndər ənga dəhə miya paməpaməu, nda nyi a vər ndər ənga Hyal, ama a'yi anə ndə mai. Ndə a'yi kəra a vər nggari sərə ju na kə mai. Arya sərə ja vər na patəu sə ngau kəra ar dəwa, ja vər na sə dədəwa lagu mambəl nyi.

³ Ama ndəra vər na ndərhaha, anə nji nga ja vər ndər aga ja nəna nda, ənga ja tsətsəkur nda, ba ja səsəkuya nda.

⁴ Ndəra wu ndər ənga vanyi dəhə miya paməpaməu, kəryi nga ju la. Ama ndər ndərhaha, fixed dəḅə dzə njir nu nga ju la.

⁵ Cimə də ca ngə aga patəkura hyi hya ndər ənga vanyi dəhə miya paməpaməu, ama yu ndiya ənga yiwu hya na ndərhaha. Ndəra wu ndərhaha nga

* **13:12** 'Yimi kəra nju məl thlər əni ar viya doragaləu.

ndiya ndəra wu ndər ənga dəhə miya paməpaməu, kəl ma vanyi ndə a'yi kəra wu sən shabiya aga dəbə dzə njir nu patə a nggabiya.

⁶ Wazha ama, ma yi shili ara hyi, kə yi sa ndər ənga dəhə miya paməpaməu, abari nga ya sən dləwar hya, kəl ma ya sən cabiya hyi mətəkər, alaga sənbiya sau, alaga na ndərhaha alaga highibə wa?

⁷ Alaga sə mbimbida'u əkkə'yi sə tsatsa kəra gəra ənga pi ənggər mbəla'wu ənga səmbəl, abari nga nju sən nggabiya dəha nda, a'yi kəl nji təkəbiya paməpamə dəha səra ndu na wa?

⁸ Ma ndər mbidə tələmə pa a'yi mbidiya ənggər kəra nju mbidə nə biyar pa mai, wa ngu səni abər gwa pa nga nja?

⁹ Abangə nga nyi, ma səra gu na wu vanyi miya kəra nji gəra nggabiya, abar nga nju sən sənbiya səra gu na? A ndərər gə nə kurthləu.

¹⁰ Ndər nə miya paməpamə a'yi gangə wu duniya, kəra gəra ənga valar dzə a'yi mai.

¹¹ Ma a'yi ya vər nggari miya kəra ga vər na mai, ba ya də məthləpi anə ngau, nagə tsu məthləpi anə də.

¹² Ənggər kə nga nyi ar kəra hyi. Ta də hya vər cim lə sə nə Mambəl, səra tsa'a ca ngə hya nərdzə aga hya hə wu lə sə lələ kəra wu həna dəbə dzə njir nu.

¹³ Agabangau, ma ndə ndər ənga dəhə miya paməpaməu, ja kədi Hyal ja uya dabar nə shabiya.

¹⁴ Ma yi kədi Hyal wu dəhə miya paməpaməu, mambəl də ngu kədi Hyal, ama dənga də a'yi ənga dləwa dzə mai.

¹⁵ Mi nga ya kyaga mələ? Yu kədi Hyal ənga mambəl də ənga tsu yu kədi Hyal ənga dənga də. Yu

thlə na ənga mambəl də ənga tsu yu thlə na ənga dənga də.

¹⁶ Ma ga vər usaku anə Hyal wu mambəl ya, abar ngə ndəra vər səhimi ngə a sən nggabiya ja na, “Amina” aga ja dləwubiya səra gu na wu lə usaku ngau, ma naja a'yi sən nggabiya maya?

¹⁷ Wu sən də abər a lər gə usaku anə Hyal, ya, lagu mani ngə ndəra vər nggar ngə wu uya cakər dza?

¹⁸ Usaku anə Hyal, ara a ndərər yau ənga dāhə miya paməpamə a ndiya hyi patəu.

¹⁹ Patə abangau, wu dabə dzə njir nu a ndiya anə də ya nabiya ndər kəra nju nggabiya batsu yidəu, a də tufu a mwara ya ndərna ndər dubu kumou ənga ndər dāhə miya paməpaməu.

²⁰ Wazha ama hya sara dənga sə ənggər wazha mai. Wu dəmwa 'yikur, hya də ənggər wazha yidəfəu, ama wu dəngar hyi hya də nji nggung-gurəm.

²¹ Tsətsəfə nga nyi wu ləkakadə Hyal abər, “Yu nda ndər anə nji də lagur miya nji paməpaməu, ənga miya məthləpi nga yu ndər anə nji kau, alaga kə

nanda wu nda səhimi də mai,” əngwar Thlagəu.

²² Hya səni ja, ndər ənga dāhə miya paməpamə ja, mətsamə ngau, a'yi anə njir nu mai ama anə njira gəra njir nu. Ndərhaha nənyi anə njir nu nga nyi, a'yi anə njira gəra njir nu mai.

²³ Karya, ma patər dabə dzə njir nu kaḃiya dzau, kə kalar ndə dzəguya ndər ənga dāhə miya paməpaməu, ma njira gəra nggabiya, alaga njira gəra njir nu sa thləwa hyi ya, a'yi hyu nggani ndu tsamə hyi ənggər nji bəbəla kər wa?

²⁴ Ama ma ndərhaha nga hyi patə a vər na, ma njira gəra njir nu, alaga njira gəra nggabiya ngə shili, kalar səra ji nggari, a'yi wu tsaviya nyi wu dəfuwa ja ba ja dzəgwa də ndə vavazə wa?

²⁵ Ma ndəra nggar ndər kau, ba sə dədəwa nə dəfuwa ja pahəbiya dzau, a biyar babal, ba ja dzəgwa bəliya undi ju dləvə Hyal, ba ja na, “Jiri, Hyal a'yi ja wu pama hyi.”

Dləvə Kəra Gəlagəla

²⁶ Mi ngə səra a'yi ja wazha ama? Ma hyi dəbəya dzə ar mwa zəməu, alenyi nji a'yi nda ənga na miya fal Hyal, vanyi ndə ənga nə highiḃau, vanyi ndə ənga sən sə mətəkər, vanyi ndə tsu ənga dəhə miya paməpaməu, vanyi ndə ənga shabiya dəhə miya paməpaməu. Patə sə'yar kau, nja məl aga cakə dzə dəḃə dzə njir nu.

²⁷ Ma hyu ndər ənga dəhə miya paməpaməu, a sara nda ndiya nji məthlə alaga nji makər mai, nda ndər ndə zəmə ayukudə ndə zəməu, kəl vanyi ndə tsu ja shabiya.

²⁸ Ama ma ndə a'yi kəra wu səni shabiya mai, bəgə nda nyi a nggya diyiwu wu dəḃə dzə njir nu, ja ndər anə kərnyi ənga Hyal.

²⁹ Ma nju ndərhaha, nji məthlə alaga nji makər nga ndər, ta'yi alenyi nji ka səya himi aga nda walbiya səra ndu na mənəhəu.

³⁰ Ma Hyal canə nyi mətəkər anə vanyi ndəra a'yi nggya, ndəra vər ndər tanggərma kə ja bəgau.

³¹ Ara patəkura hyi a sən na ndərhaha vanyi ndə ayukudə vanyi ndau, aga kalar ndə a highiḃər sau ənga ja uya tsətsəku dəfu.

³² Njir ndərhaha ndu sən kəkəya kərnda.

³³ Arya Hyal a'yi Hyal nə dliya kər ngə mai. Hyal nə nggya jamə ngau.

Abangə tsu wu daḅə dzə nji cici gə Hyal patəu,

³⁴ mathləkə'yi nda nggya ḏiyiwu wu daḅə dzə njir nu, arya nji a'yi nə nda lagur ndər a ndəna mai, kəl nda ḏa njir ngga sərə nji nana, ənggər kərə dladə Musa nana.

³⁵ Ma sə a'yi kərə nda yiwu nda səni, ba nda yiwari ara shili a ndu ki, arya sə səsəli ngə anə ndə mala ja ndər wu pama daḅə dzə njir nu.

³⁶ Hyu nggani abər ara hyi ngə ndər Hyal dzəguya dzə ya? Abər anə hyi wacu nga nji shili əni ya?

³⁷ Ma gu nggani abər nagə nabi nga gau, ənga nyinyi nga gau wu mambəl, gu kyaga səni abər sə kə ya vər tsəfə kau, sər ḅəla ngau, sara ara Thlagəu ənga kərnyi.

³⁸ Ma a'yi ji hənggəri ənga sə kə mai, nju nda hənggəri ənga ja tsu mai.

³⁹ Nahyi wazha ama ta'yi hya ḏa njir cim ndərhaha, ama hya sara ka nji ara ndər ənga miya paməpamə mai.

⁴⁰ Ta'yi nja məl kalar sə ənggərə ja tsa'a nja məl wu lagu nyi tsu.

15

Hya'arir Yesu Sara Vir Tau

¹ Kabangəkə tsu wazha ama, yu yiwu ya dəngari hyi ar kərə ndəshigu kərə yi tətəlna hyi, ba hyi dləwuri ta, kərə mbərsar hyi ta'yi ari.

² Lagu ndəshigu kə nga hyi uya mbədaŋ, ma hyi səbiya ɓaɓalu ndər kəra yi tətəlŋa hyi. Ma a'yi ɗa abangə mai, mbərsar hyi a ɗari sə kurthləu.

³ Ara sərə yi dləwuri ca nga yi nər hyi ar viya sə kəra ndiya əŋga mənəhəu, abər Kərsiti a təri arya bikər mən, əŋgər kəra ləkakadə Hyal nana.

⁴ Abər, nji hadəna nyi, ayukudə pida makəru ba ji hya'ari sara vir tau, əŋgər kəra ləkakadə Hyal nana,

⁵ ba ji canə nyi kərnyi anə Kefasu ba anə cama səsə kumo apə məthlə kau.

⁶ Ayukudə kau, kə ji cabiya kərnyi anə wazha ama kəra a ndiya gharu tufu aga zəməu, gangə wu pama nda a'yi nda əŋga pi ba'anə kabangəkau, alaga kə alenyi nji a tər kau.

⁷ Ba ji canə nyi kər anə Yakubu ba anə patər cama səsə'yar,

⁸ ayukudə nyi patəu, ba ji cabiya ɗa kər tsu, nayi ndəra gərə tsa'a ya kyaga lari nyi.

⁹ Ara nayi nga ndiya əŋga kushu wu pama cama səsə'yar patəu, əŋga a'yi a kyau nja ngga ɗa cama səsə mai, arya yi lər ɓwaɓwatə gagadau anə ɗaɓə dzə njir nu nə Hyal.

¹⁰ Ama lagu mayiwakur nə Hyal nga yi sərə ya ga nyi kau, əŋga mayiwakur nyi anə ɗa, a'yi sə kurthlə mai. Awau, a mələr yi thlər a ndiya nda patəu, alaga kə a'yi nayi ngə məl thlər kə əŋga kərdə mai, ama mayiwakur nə Hyal kəra a'yi əŋga yi kau.

¹¹ Ama a'yi ɗa vanyi sə mai, tara nayi alaga nanda ngə tətəlŋa ndəshigu kau, ca ngə sərə hyi həŋgəri əni.

Hya'ari Sara Vir Tau

¹² Ta ɗa nja vər tətəlna ndər Hyal abər Kərsiti a hya'ari sara vir tau, ya lagu mani ngə alenyi nja vər na abər hya'ari sara vir tau a'yi mai ya?

¹³ Maja bər hya'ari sara vir tau a'yi mai, a cabi-yari abər Kərsiti a'yi hya'ari sara vir tə mai.

¹⁴ Maja bər Kərsiti a'yi hya'ari sara vir tə mai, tətəlna ndər Hyal kəra mənə vər məl patə sə kurthlə ngau, ənga abangə tsu ngə mbərsar hyi.

¹⁵ A biya banga kau, a ɗar mən ənggər njir lə sakida nə fati ar kəra Hyal, arya mən lər sakida ar kəra Hyal abər ji hya'ana Kərsiti sara vir tau. Ama naja a'yi hya'ana nyi sara vir tə mai, ma jijiri nji a'yi wu hya'ari sara vir tə mai.

¹⁶ Maja bər nji tətə a'yi wu hya'ari sara vir tə mai, Kərsiti tsu a'yi hya'ari sara vir tə mai.

¹⁷ Ənga maja bər Kərsiti a'yi hya'ari sara vir tə mai, mbərsar hyi a ɗari sə kurthləu ənga tsu, tsu hyi wu bikər hyi.

¹⁸ Maja abangau, patər njira tə wu Kərsiti a sar nda.

¹⁹ Maja bər fər kər kəra ara mən wu nggyabiya nə kabangəkau nga nyi wacu, a ɗar mən sər təhudəu a ndiya patər nji.

²⁰ Ama Kərsiti a hya'ari ja sara vir tau, naja ngə sə nə ɗaramwa wu pama njira tau.

²¹ Ənggər kəra tə shili lagu ndə zəməu, abangə tsu ngə hya'ari a vir tə shili lagu ndə zəməu.

²² Ara ənggər kəra mən tətə patə wu Adamu, abangə tsu kalar ndəra wu Kərsiti ju hya'ari ənga pi.

²³ Ama nju nda hya'ana kalar ndə sara vir tə ma pəci nyi ɗa. Kərsiti ngə ɗaramwa nə hya'ari sara vir

tau. Ar pəcira ju nda sha shida wu duniya, abangə tsu ju sa hya'ana njira nənyi.

²⁴ Ayukuda kə ngə jomə ndəl a dzəgwa shili, ar pəcira ju lər təlkur anə Hyal tada, ayukuda ji sana təl təl'yar, ənga njir səm təlkur ba patər njir dənama.

²⁵ Arya kəl Kərsiti dumwa ənga səm təlkur kəl ma ji fiya patər dawa nyi'yar əgya kida hiya ja.

²⁶ Dawa kəra ju nda tsiya ayukudə patəu, ca ngə tau.

²⁷ Arya tsətsəfə nga nyi wu ləkakadə Hyal abər, Hyal “a fiyari kalar sə əgya kida hiya ja.” Ənggər kəra ləkakadə nana, “Kalar sau” a fiyar nji əgya kida ja. A cabiyari abər a'yi dabə əkkə'yi Hyal ənga kənyi ngə əgya kida Kərsiti mai, ama Hyal ngə fiya kalar sau əgya kida Kərsiti.

²⁸ Ama, ar pəcira Hyal fiya kalar sə a gya kida dənama təlkur nə zər nyi, zər nyi tsu ba ja fuwa kənyi a gya kida dənama təlkur nə Hyal, aga Hyal ja da a dar kəra patər sau.

²⁹ Maja bər kabangəkə hya'ari sara vir tə a'yi mai, mi ngə nji ka nda mələ, njira nji hər nda baβətizəma ar viya nji tətə? Maja bər nji tətə a'yi ndu hya'ari sara vir tə mai, ara mi nga nju məl baβətizəma arya nda?

³⁰ Ənga anə kərmən, arya mi nga mən wu fə kərmən a miya tə arya ndər Hyal kalar pəci ka?

³¹ Jijiri nga yu na anə hyi wazha ama, ənggər kəra ya vər βwasə ənga hyi wu Kərsiti Yesu Thlagər mən, bama ənga bama nga yi ənga tə kalar pəci.

³² A vu məlmə Afisa nji shili ənga par kəpal anə da ənggər sər tagəu, ba yi pana pa nyi. Maja bər aga kərda nga yi məl, mi ngu nda da akkəri da? Maja

bər nji tətə a'yi wu hya'ari sara vir tə mai, ya,
“Ta'yi mənə gu mini nə səm ənga sa,
arya əzəgə ma vanyi ba mənə sa tau.”

³³ Nja sara ngguta hyi mai! “Arya nggya ənga nji papatagəu wu dla ənga nggya papatagəu.”

³⁴ Sha mau a shili wu hangəkalər hyi, ba hya piyari məl bikau. Ara alenyi nji wu pama hyi a'yi wu sənbiya Hyal mai. Yu na sə kə anə hyi abangə aga hya gu səli.

Dzə Nə Hya'ari Sara Vir Tau

³⁵ Ama ba vanyi ndə a yiwa abər, “Abari nga nju hya'ana nji tətə sara vir ta? Wa thləmə culi dzə kəra ndu hya'ari əna?”

³⁶ Wa thləmə najaka dzakura? A'yi hyu səni abər kalar sərə nji thləkana, a'yi wu tsə mai, kəl ma ji tə kwatahə wa?

³⁷ Ar pəcira gu thləka sau, a'yi dzə kəra wu nda nggya nga gu thləka mai, ama culi nga gu thləka, alaga culi uhi əndəga vanyi sə paməu.

³⁸ Ama Hyal ngə wu lə dzau anə culi kau, ənggəra ju yiwu ja də. Anə kalar culi tsu ba ja nə nyi culi dzə kəra tsa'a aga ja.

³⁹ A'yi patər kumər dzə ngə zəmə mai. Pamə ngə kumər dza nji, pamə ngə nə ma'wi, ənga pamə ngə nə 'yagə'yar, ba nə kalfi tsu pamə nga nyi.

⁴⁰ Sə paməpamə a'yi gangə kəra Hyal məliya a dəməlmau, ənga paməpamə tsu wu duniya. Ama kadakadarkur nə sərə a dəməlmau pamə nga nyi ara kadakadarkur nə sərə wu duniya.

⁴¹ Kadakadarkur nə pəci pamə nga nyi, ətsu kadakadarkur nə hya pamə nga nyi, abangə tsu ngə kadakadarkur nə shashilga'yar, ənga tsu

paməpamə ngə kadakadarkur nə shashilga a mwara vanyi shashilga.

⁴² Abangə nga nyi tsu ənga hya'ari sara vir tau. Dzə kəra nju thləkana a gyu'yi wu dīya, ama ma ji hya'ari, ju hya'ari ənga pi kəra gəra tau.

⁴³ Nju thləkana nyi a gyu'yi gəra ənga kadakadarkur, ama ba ja hya'ari ənga kadakadarkur. Nju thləkana a gyu'yi gəra ənga dənama, ama ba ja hya'ari ənga dənama.

⁴⁴ Nju thləkana nyi ənga kumər dzə nə ndəndəkur, ama ba ja hya'ari ənga dzə nə mambəl.

Ənggər kəra dzə nə ndəndəkur a'yi, dzə nə mambəl a'yi tsu.

⁴⁵ Abangə nga nyi tsətsəfau, abər, “Ndə nə tanggərma Adamu, dā ndə ənga pi.” Adamu nə yukudu tsu, naja ngə mambəl nə lə pi.

⁴⁶ Ndə nə mambəl a'yi shili tanggərma mai, ama ndə nə kumər dzau, ayukuda ta ndə nə mambəl dzəgwa shili.

⁴⁷ Ndə nə tanggərma shili sara wu bəbər, ama ndə nə məthləkura nyi shida sara dəməlmau.

⁴⁸ Ənggər kəra ndəra biya sara wu bəbər kau, abangə tsu ngə kalar njira biya sara wu dza ja, bəbər nga nda. Ənggər kəra ndəra sara dəməlmau, abangə tsu ngə kalar njira a dəməlmau.

⁴⁹ Ənggər kəra mən pabiya ndəra sara wu bəbər, abangə tsu nga mən wu nda pabiya ndəra shida sara a dəməlmau.

⁵⁰ Səra yu na anə hyi wazha ama, ca ngə kumər dzə ənga mashi a'yi wu uya fa'a ki nə təlkur Hyal mai. Abangə tsu dzə kəra wu dīya, a'yi wu fa'abiya ki ənga dzə kəra gəra dīya mai.

⁵¹ Nggara mau, yu nar hyi sərə dədəwa! A'yi patəkura mən ngu nda tə mai, ama nju nda bəlana dza mən patəu, a ndu dzə mafəliyangə,

⁵² ənggərna, ənggər kərə ndə wu də maci ənga li, ma nji nda mbədiya tələmə nə jomə ndəl. Tələm wu nda mbədiya dzau, ba nji tətə wu Kərsiti a hya'ari ənga pi gərə kudau, njira tsu ənga pi ar pəci ta, ba nda bəlana dzau.

⁵³ Sərə wu diya, kəl ji hər dzə kərə gərə diya. Sərə wu tə tsu, kəl ji bəlar dzə ənga sərə gərə tau.

⁵⁴ Ar pəcira dzə kərə wu diya nda har dzə kərə gərə diya, ənga dzə kərə wu tə har dzə kərə gərə tau, ar pəci ta ngə ndər kərə tsətsəfə wu də jiri, abər, “A səmkur nji təlkur ar kərə tau.”

⁵⁵ “Kara nagə tau, əmani ngə səm təlkur nga?

Tau, əmani ngə da nga?”

⁵⁶ Da nə tau, ca ngə bikau, ənga dənəma nə bikau, ca ngə dladau.

⁵⁷ Ama usaku anə Hyal! Naja ngə nə mən səm təlkur lagu Thlagər mən Yesu Kərsiti.

⁵⁸ Agabangau, zamər 'wa də 'yar, hya ta'yi pir ənga dənəma cumu. A sara vanyi sə a jahəna hyi mai. Cumu hya lər kərhyi aga məl thlər nə Thlagəu, arya hyu səni abər nərdzər hyi wu Thlagəu, a'yi wu də sə kurthlə mai.

16

Tsəm Sau Aga Dləwa Nji Cici Nə Hyal

¹ Ndər ar kərə tsəm sə anə nji cici nə Hyal, ta'yi hya məl ənggər kərə yi nar nyi anə dəbə dzə njir nu 'yar kərə wu Galatiya nda məl.

² Kalar pəci tanggərma nə sugu, kalar ndə ja kyaga fiya tsa'a sara wu sərə ji uya sara wu uya nyi, aga ma yi sha shili kəl həri sərə 'yi fwatəu, a'yi kəl nji dzəgwa tsəm sə mai.

³ Ar pəcira yi sha shili, yu sa səwa njira hyi hənggəri ənga cama tsətsəfə ar kərə nda, aga nda sa həri lə sə dləwa dzər hyi a vu Urshalima.

⁴ Ma hyi lari a dəri tsa'a aga ya ma'yi tsu ba nda ləbiya də.

Fə Sə Wu Lagu Nə Bulusu

⁵ Yu bərə nda sha shili ara hyi ayukudə yi bəbiya bəu wu Masidoniya, arya lagu Masidoniya nga yu ma'yi.

⁶ A sən də yu nda səkari əkkə'yi hyi, ma wu sən də ba mənə həbiya vuya kə əkkə'yi hyi, aga hya dləwar də wu bə də kau, kalar vira yu ma'yi a ndari.

⁷ A'yi yiwu də ngə ya lari hyi ba ya tərabiya mai, awau, dəfuwa yu yiwu ya səkari əkkə'yi hyi, ma Hyal hənggəri.

⁸ Ama yu səkari ənggau wu Afisa kəl ma pəcir Pentikosu shili.

⁹ Arya madiya lagu nə məl madiya thlər a pahəri anə də, ama dawa gangə a vər da laguwa nyi.

¹⁰ Ma Timathlawusu shili, hya nə nyi nggya papalkər wu hyi, arya ndər məl thlər Hyal nga ja tsu ənggər nayau.

¹¹ A sara hya didə nyi mai, hya səwa nyi wu lagu ənga hudə pərtəu aga ja sha shila ara yau. Yu vər səkə nyi, nanda əkkə'yi wazha ama 'yar.

¹² Sərə ya sən na ar kərə Apolusu, ca ngə ya vər kədi nyi ənga jirkur aga ja nda tular hyi, naja

əkkə'yi wazha ama, ama naja a'yi wu yiwu ja shili kabangəkə mai, ama ju nda shili ma ji uya lagu.

Ndər Tsətsəku Dəfu Nə Jomə Ndəl

¹³ Hya nggya lili'u, hya ciya dzə wu mbərsar hyi, hya da ənga mba dəfu, hya da ənga dənama.

¹⁴ Kalar sərə hyu məl hya məl ənga yiwukur.

¹⁵ Wazha ama hya səni abər njir kir Sətifanusu nanda ngə njir nu nə tanggərma nə 'yi'yir Akaya, a lər nda kər aga məl thlər anə nji cici gə Hyal.

¹⁶ Ya vər kədi hyi, aga hya lər kərhyi anə culi nji ənggər kau, ənga patər njira dəbər kər ənga hyi wu thlər kau, ənga dənamar nda.

¹⁷ Huda ya pidari ənga shilir Sətifanusu, ba Focinatusu ba Achayikusu, arya ndə dla ənga dləwa dzə ənga sərə caja ara hyi.

¹⁸ Arya ndə mbəbiya mambəl da ənga nər hyi tsu. Culi nji ənggər kau hya gənggər nda səli.

Usadzə Nə Jomə Ndəl

¹⁹ Dabə dzə njir nu 'yar nə 'yi'yir Asəya a vər usa hyi. Akwila ənga Pərsila, ənga dabə dzə njir nu kəra wu kir nda, nda vər usa hyi gagadə wu Thlagəu.

²⁰ Patər wazha ama 'yar kəra ənggau nda vər usa hyi. Hya usar dzau ənga bərpə dzau nə yiwukur kəra cicau.

²¹ Nayi Bulusu nga vər tsəfə usa dzə kə ənga tsa yau.

²² Patər njira gəra yiwu Thlagəu, bəgə nda da nji shishi'wau. Thlagəu, shili.

²³ Ta'yi mayiwakur nə Thlagəu Yesu a nggya ənga hyi.

²⁴ Yiwudzə da anə hyi papatəu, wu Kərsiti Yesu. Amina.

Ndəshigu'yar Fodəu Ənga Thlər Cama'yar
The New Testament in the Marghi South language of
Nigeria: Ndəshigu'yar Fodəu Ənga Thlər Cama'yar

copyright © 2024 The Seed Company

Language: (Marghi South)

Contributor: Initiative for the Translation and Development of African Languages

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-13

PDF generated using Haiola and XeLaTeX on 13 May 2025 from source files dated 13 May 2025

63471087-0de7-5f4b-aa1f-ca2e66571a95